

- प्रधानमंत्री नरेन्द्र मोदी सेवा ने सब ऊं मोटी धर्म अर कर्तव्य बतायो-कह्यो-सेवाभावना ही देश री बरकत री सब ऊं मोटी प्रेरक ताकत बण सके है।
- राज्य मांय पंचायत चुनाव सारू आरक्षण लॉटरी रो काम पूरो व्ह्यो-आज वार्ड पंच अर सरपंच ओहदा सारू लॉटरी निकाळी ज्यी।
- आरजीएचएस मांय प्री-ऑथोराइजेशन व्यवस्था लागू करण ऊं दावां मांय 47 फीसदी री कमी आयी।
- प्रदेश मांय चौमासा री बिरखा करीब-करीब बंद व्हेवण सागे ई गर्मी रो असर बध्यो-केई ठोडां दिन री बगत तापमान 40 डिग्री सेल्सियस ने पार कीनो।

प्रधानमंत्री नरेन्द्र मोदी कह्यो है के जिंदगी रो खास मकसद सेवा है अर हर एक जणा मांय सेवा भावना व्हेवणी चाहिजे। वे आज गुजरात रा बड़नगर ऊं वाराणसी ताई यात्रा कर रह्या सेवा यात्रियां सागे वीडियो कॉन्फ्रेंस रे जरिये बातचीत कर रह्या हा। श्री मोदी कह्यो के सेवा परम धर्म है, सब ऊं मोटी कर्तव्य है अर आ भावना देश री बरकत री सीख देवण वाळी सब ऊं मोटी ताकत बण सके है।

0000

श्री मोदी कह्यो के जद सेवा री भावना देश री नीतियां मांय शामिल व्हे है तो जनता रा भला री योजनावां सामी आवे है अर आं ई कल्याणकारी योजनावां ऊं 25 करोड़ लोगां ने गरीबी रा कुचक ऊं बाहर निकळबा मांय मदद मिली है। सेवा यात्री ई प्रधानमंत्री सामी विचार बताता थका कह्यो के ई रा तैत पौधा रोपी ज्या अर स्वच्छता अभियान चलायी ज्या। प्रधानमंत्री यात्रा मांय शामिल व्हेवण वाळां ऊं विविधता में एकता रा अनुभव देश रा हर कोना ताई पूगावण री अरज कीनी। मुख्यमंत्री भजनलाल शर्मा ई बीकानेर ऊं ई कार्यक्रम मांय वर्चुअल तरीका ऊं जुड़्या। वे कह्यो के अनुशासन, दया अर सामाजिक जिम्मेदारी जनता ने जोड़े है।

0000

प्रदेश मांय व्हेवण वाळा पंचायत चुनाव सारू आज उपखंड मुख्यालयां माथे वार्ड पंच अर सरपंच ओहदा सारू लॉटरी निकाळी ज्यी। आरक्षण री स्थिति साफ व्हेवण सागे ई संभावित उम्मीदवारां री हलचल बध गयी है अर दावेदारी री रणनीति बणायी जा रही है। ई बीचे, जयपुर, जोधपुर अर कोटा नगर निगम मांय महापौर ओहदा रा चुनाव सारू काल वोट पड़ेला। सुकेत नगर पालिका रा अध्यक्ष ओहदा सारू ई काल वोट डाल्या जावेला। वोट संवारे 10 ऊं दोपहरां पाछे 2 बज्यां ताई वोट दिया जा सकेला। चुनाव अधिकारी आशीष कुमार बतायो के वोट पड़बा रो काम पूरो व्ह्यां पाछे तुरत ई वोटों री गिणती करी जावेला। भारतीय जनता पार्टी रा प्रदेश अध्यक्ष मदन राठौड़ आज जयपुर मांय खबरनवीसां सागे बातचीत रे दौरान पंचायत चुनाव मांय ई पार्टी ने बहुमत मिलण री उम्मीद जतायी। दूजी कानी प्रदेश कांग्रेस अध्यक्ष गोविंद सिंह डोटासरा ई आज जयपुर मांय खबरनवीसां सागे बातचीत करता थकां कह्यो के पंचायत चुनाव मांय वां री पार्टी मजबूती ऊं उतरेला।

0000

भारतीय जनता पार्टी रा राष्ट्रीय अध्यक्ष नितिन नबीन रो काल जयपुर रा दौरा रो कार्यक्रम है। वे सेवा संकल्प अभियान रा तैत स्वच्छता सेवा कार्यक्रम मांय शामिल व्हेला। श्री नबीन जयपुर कने दादिया गांव मांय पंडित दीनदयाल उपाध्याय री जयंती रे मौके राख्या जावण वाळा जळसा मांय ई शामिल व्हेला। वे दादिया ऊं ई पंचायत चुनाव सारू पार्टी रा अभियान री सरूआत रा तौर ऊं प्रचार रथ रवाना करेला। वां रो जयपुर रा बिड़ला सभागार मांय नौजवानां सागे बातचीत रो ई कार्यक्रम है।

0000

प्रदेश रा सगळा आंगनबाड़ी केन्द्रां मांय काल आंगन मिलन सेवा सरू करी जावेला। महिला अर बाल विकास विभाग री शासन सचिव बतायो के तीन दिन रा ई कार्यक्रम मांय जनसेवा, सामाजिक सरोकार, पोषण अर स्वास्थ्य ऊं जुडी योजनावां री जाणकारी अर फायदो जनता ताई पूगावण री कोशिश करी जावेला। वे जनता, वां रा नुमाइंदां अर संस्था प्रधानां ऊं ई कार्यक्रम मांय भागीदारी करण री अरज कीनी। ई बीचे विकसित भारत जनसेवा अभियान रा तैत आज न्यारी-न्यारी ठोड़ां रंगोलियां सजाई ज्यी।

0000

मुख्यमंत्री आयुष्मान आरोग्य योजना अर राजस्थान सरकार स्वास्थ्य योजना— आर.जी.एच. एस. रा काम मांय साफगोई बधावण अर गैर-जरूरी जांचां माथे रोक लगावण सारू लागू करी ज्यी प्री-ऑथोराइजेशन व्यवस्था ऊं दावां मांय 47 फीसदी री कमी दर्ज करी ज्यी है। 15 जुलाई ऊं लागू करी ज्यी ई व्यवस्था रा तैत 2 हजार ऊं बत्ती जांचां सारू पैली मंजूरी लेवणो जरूरी करी ज्यो है। चिकित्सा अर स्वास्थ्य विभाग री प्रमुख शासन सचिव गायत्री राठौड़ आ जाणकारी दीनी। वे बतायो के डॉक्टर री पर्ची, जांच अर दावां माथे लगातार डिजिटल तरीका ऊं निगरानी राखी जा रही है। वे बतायो के कोटा रा 2 अस्पतालां रो ट्रांजेक्शन मेनेजमेन्ट सिस्टम-टीएमएस ब्लॉक करी ज्यो है, जदके 3 डॉक्टरां री आईडी ब्लॉक करी ज्यी है।

0000

राजसमंद जिला रा रेलमगरा हलका मांय आज ट्रैक्टर पलट जावण ऊं 4 जणा री मौत व्हे ग्यी अर 11 जणा जख्मी व्हे ग्या। जख्मी लोगां ने जिला अस्पताल मांय भर्ती करायी ज्या है। रेलमगरा रा थानाधिकारी प्रवीण सिंह जुगतावत बतायो के ट्रैक्टर मांय सवार ऐ लोग तुर्कीया खेड़ा गांव रा रहवासी हा, जो सांसेरा रा माताजी तळाब ऊं गणेश विसर्जन कर र पाछा आ रह्या हा।

0000

राज्यपाल हरिभाऊ बागडे ग्रेटर नोएडा मांय एक बस मांय लाय जाग जावण रा वाक्या माथे गहरो शोक जतायो है। वे हादसा मांय जान गमावण वाळां रा पिरवारां ने ओ दुःख सहन करण री ताकत अर जख्मी लोगां रे बेगा ठीक व्हेवण री कामना कीनी है। ध्यानजोग है के काल रात दिल्ली ऊं महोबा जा रही एक गैर सरकारी स्लीपर बस मांय यमुना एक्सप्रेस वे माथे लाय लाग जावण ऊं 9 जणा री मौत व्हेग्यी ही अर कई मुसाफिर जख्मी व्हे ग्या हा। ई हादसा रे कारण मरण वाळां रा पिरवार वाळां ने प्रधानमंत्री राष्ट्रीय राहत कोष ऊं 2-2 लाख रुप्या अर जख्मी लोगां ने 50-50 हजार रुप्या री मदद देवण रो एलाण करी ज्यो है। दूजी कानी जोधपुर रा बासनी औद्योगिक हलका मांय काल एक केमिकल फैक्ट्री मांय लागी लाय रे कारण वठे रख्योडा केमिकल रा ड्रम मांय घमाको व्हेवण ऊं दमकल वाळा 13 जणा झुलस ग्या। घणा जख्मी 6 जणा ने जयपुर रैफर करी ज्या है।

0000

मोटा अनाज यानि श्रीअन्न पोषक सामग्री ऊं भरपूर व्हे है। ऐ शुगर अर दिल री बीमारियां समेत भांत-भांत री बीमारियां रा ईलाज मांय फायदेमंद साबित व्हे है। जयपुर रा सवाई

मानसिंह मेडिकल कॉलेज रा वरिष्ठ आचार्य डॉ. पुनीत सक्सेना आकाशवाणी सागे बातचीत रे दौरान बतायो के श्रीअन्न मांय फाइबर, प्रोटीन, मिनरल्स अर एंटी ऑक्सीडेंट्स व्हे है। श्रीअन्न मांय ग्लूटेन नी व्हे है अर वे गेहूं अर चावल री तुलना मांय बत्ता पौष्टिक व्हे है।

000

प्रदेश मांय चौमासा री बिरखा लगभग बंद व्हे जावण सागे ई पारो ओजू चढबा लाग्यो है। राज्य रा आतूणी हलका मांय दिन री बगत तापमान सामान्य ऊं करीब पांच डिग्री सेल्सियस ऊंचो चाल रह्यो है। जैसलमेर मांय पारो 42 डिग्री सेल्सियस ने पार कर ग्यो। बाड़मेर, बीकानेर, जोधपुर, चूरू, नागौर अर पिलानी मांय ई अधिकतम तापमान 40 डिग्री सेल्सियस ऊं ऊंचो नापी ज्यो। मौसम विभाग रे मुजब आवता तीन-चार दिन मौसम सूखो रेहवण रा आसार है। ई पाछे 27 ऊं 29 सितम्बर बीचे भरतपुर अर जयपुर संभाग सागे शेखावाटी हलका मांय कठे-कठे हल्की ऊं मझला दर्जा री बिरखा रा आसार है।

000

प्रदेश मांय जी.एस.टी. चोरी रे खिलाफ चलाया जा रह्या अभियान रा तैत 5 कारोबारी ठिकानां माथे सर्वे अर जांच री कार्रवाई करी ज्यी। ई दौरान 22 करोड़ रुपया ऊं बत्ती रकम रो संभावित टेक्स बण्यो। आ कार्रवाई भिवाड़ी, सरदारशहर, जोधपुर, बाड़मेर अर जैसलमेर जिला मांय करी ज्यी।

0000

नीट पीजी परीक्षा –2026 रा नतीजा रो राष्ट्रीय चिकित्सा विज्ञान परीक्षा बोर्ड री आधिकारिक वेबसाइट माथे ऐलाण कर दियो ज्यो है। साल 2026–27 रा प्रवेश सत्र मांय एम.डी., एम. एस., डी.एन.बी. अर पीजी मेडिकल डिप्लोमा कोर्स मांय दाखिला सारू 30 अगस्त ने देशभर मांय आ परीक्षा लीरीजी ही, ज्यी मांय 2 लाख 65 हजार 960 उम्मीदवार शामिल व्ह्या हा।

0000

प्रधानमंत्री नरेन्द्र मोदी 27 सितम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 138वीं कड़ी व्हेला। ई सारू आप ई मुफ्त नम्बर 1800–11–7800 माथे काल तांई राय दे सको हो। नरेन्द्र मोदी एप अर माय जीओवी ओपन फोरम रे जरिये ई विचार भेज्या जा सके है।

0000